

《善思童子經》 CBETA 電子版

版本記錄: 1.1

完成日期: 2002/11/04

發行單位: 中華電子佛典協會 (CBETA) cbeta@ccbs.ntu.edu.tw

資料底本: 大正新脩大正藏經 Vol. 14, No. 479

No. 479 [Nos. 477, 478]

善思童子經卷上

隋天竺三藏闍那崛多譯

如是我聞。一時婆伽婆住毘耶離城。在菴婆羅波梨園內。與諸聲聞八千比丘一萬菩薩。如是大眾一切悉皆變化形服作諸天身。爾時世尊於晨朝時著衣持鉢。將此化眾前後圍遶。入毘耶離大城之中次第乞食。漸漸行至毘摩羅詰離車之家。當於是時毘摩羅詰離車家內。有一童子名曰善思。是時善思在於自家重閣之上嬾母抱持。時彼童子手中秉執一莖蓮華翫弄嬉戲。而彼童子以其宿植眾善所熏。又佛世尊神通力故。令此童子忽然以偈白其嬾母。作如是言

今有響微妙	翳諸音樂聲
願嬾放我身	捨置於樓上
而此光明照	決是大丈夫
右足跨於闔	欲入此城門
微妙令意喜	諸鳥鳴喚聲
我耳未曾聞	諸鳥如是唱
決定是調御	為利益世間
右足跨於闔	欲入此城門
如服諸瓔珞	遍體震鳴聲
其響妙鏗鏘	聞者皆歡喜
決定千輪足	威神莊嚴身
右足跨於闔	欲入此城門
猶彼大地震	亦如打銅鍾
諸如是等聲	無有不聞者
決定彼人日	大聖之身光
欲入此大城	令眾生無畏
如諸林樹木	種種華莊嚴
各聞微妙音	眾生隨所樂
決定善安住	與願大龍王
右足跨於闔	欲入此城門
如虛空光照	大地普皆明

日彩曠不彰	此世尊金色
決定喜觀察	大威放焰光
右足跨於闔	欲入此城門
阿彌今觀此	天眾在虛空
歡喜歌嘯聲	弄諸衣服等
決定利益世	最勝諸眾生
右足跨於闔	欲入此城門
今此大城內	相向起慈心
各各共喜歡	如父母愛子
決定大福聚	眾德莊嚴身
右足跨於闔	欲入此城門
又男夫婦女	將種種香花
滿掬四面飄	心生大歡喜
決定大自在	福德華莊嚴
右足跨於闔	欲入此城門
天人華所散	悉遍滿虛空
處處雨眾香	微妙甚可熹
決定世善逝	大福慧入城
為利益眾生	所以今來到

爾時善思懷抱彌母。聞其童子自口所說如此偈已。心生恐怖身毛悉豎。支節戰掉不能自持。安彼童子於樓閣上置已。即作如是思惟。此子何也。為天為龍為是夜叉。為是羅刹為鳩槃荼。為毘舍遮為緊陀羅。或復為是摩睺羅伽。如此之言非是世間嬰孩所說。時彼彌母即一定住不敢動移。亦不起行不敢大語。細喘低頭默然察聽

爾時世尊漸漸行近善思離車童子之家。入彼街巷至於其家門前止住。而是善思離車童子。遙見世尊在於閣下。見已即便從高樓上投身向佛。是時善思離車童子。以佛神力在於空中巖然而住。即以偈頌而白佛言

世尊住智中	最勝者住此
利諸眾生故	願受我蓮花

爾時世尊即還以偈。報於善思離車童子。作如是言

我所住實際	非眾生境界
彼際無所有	是際如實相

爾時世尊說是語已。離車童子復更以偈。而白佛言

世尊云何住	於此真實際
此際既無有	無有何所住

爾時善思離車童子說是語已。佛復以偈而更報言

如際實際者 彼際是如來
如彼實際住 我住彼亦然
如實際諸佛 其體一無殊
如彼真實際 我作如是住

爾時世尊說是語已。善思童子復更以偈。重白佛言

非際際非際 此際有何相
作何等方便 得名為實相

爾時善思離車童子說是語已。佛復以偈。而更報言

不可執際際 故言為實際
彼際如虛空 虛空亦無相

爾時世尊說是語已。善思童子還更以偈白於佛言

希有真實處 住處最上住
願眾生住此 如諸佛所住

爾時善思離車童子說此偈已。一心合掌而白佛言。惟願世尊。慈愍我故受此蓮華。爾時世尊為欲憐愍善思離車孩童童子故受彼蓮華。佛受華已。是時善思離車童子。歡喜踊躍發是願言。籍此善根我於來世。若當證得阿耨多羅三藐三菩提已。如今世尊。為於一切眾生說法。然其法中諸凡夫法及阿羅漢。一切聖法皆不可得。爾時長老舍利弗同在集會聞是語已。於大眾中即問善思離車童子作如是言。離車童子。汝向所言我當證彼如是法已。為諸眾生說於彼法。云何說法彼法云何。爾時善思離車童子。即以偈答舍利弗言

彼法無有佛 及諸聲聞得
我當證是法 為諸眾生說
彼法無處所 亦復無去來
智者如是知 法之本體性
過去一切佛 現在無上尊
無不如是知 入無餘寂滅
彼中無法界 眾生界亦無
如是之邊際 世間無入者
法界惟名字 字從分別生
分別無分別 究竟不可得

爾時長老富婁那彌多羅尼子。即於眾中還以偈問善思童子。作如是言

童子汝云何 能學解此法
甚深無譬喻 諸智者所迷
汝今身未行 已作如是辯

能對最第一 智慧大聲聞
汝體如真金 遍皆巧知解
顯赫此城巷 如月處虛空

爾時善思離車童子即還以偈。答於長老富婁那彌多羅尼子。作如是言

尊者今言生 此生無有處
諸法無生故 當生此是何
諸法既無生 何者名真體
此我說本性 一切諸法無
法及法本性 二俱不可得
二既不可得 此法諸佛說
是名最上輪 鹿苑中前轉
虛空搦拳已 令覺多聲聞
唯鳴於法聲 眾生多誑惑
乘方便及者 當說如真實
言生及死者 是名凡夫境
此之顛倒見 富婁那未盡
生死及彼此 世間人言語
無言語法中 假以語言說

爾時長老富婁那彌多羅尼子。聞此偈已歡喜稱讚。即便白佛作如是言。希有婆伽婆。希有修伽陀。此之善思離車童子。乃有如是甚深智慧難可度量。是時佛告富婁那言。如是如是。汝富婁那如汝所說

爾時世尊。問於善思離車童子作如是言。善思童子。汝今欲為何誰證於阿耨多羅三藐三菩提。是時善思離車童子。即以偈頌而答佛言

佛最勝世尊 知而故問我
欲為誰著鎧 今當真實宣
我無所為人 亦無著鎧者
甚深上法中 無受化眾生
眾生非眾生 一切皆無有
此處不迷惑 彼名為世尊
如是生解法 如實際常處
非一非無異 此甚深最上
我當令覺眾 彼眾生亦無
眾生體既無 彼中何有智
智慧及眾生 性畢竟非有
若能如是解 彼名世智人

爾時善思離車童子。說是偈已而白佛言。大聖世尊。我若當來自覺了知如是法已。為諸眾生作如是說。是時長老阿難比丘。於大眾中即從座起而白佛言。世尊。希有婆伽婆。希有修伽陀。此之善思離車童子乃能如是宣說甚深微妙法句。不染著句無倚著句。此深法中天人世間恐怖迷沒。世尊。如是實性甚深法中誰不欲行。惟有昔於甚深法中有因緣者乃能生信。爾時阿難欲重宣此義。而說偈言

猶如聚真金	遙觀妙顯赫
此善思童子	處在大眾中
譬如須彌山	安住於海內
如是善說法	彌覆此世間
無有及非無	善思童子說
如是彼實際	實際亦空無
汝今說此時	不曾生恐怖
善思汝如是	我云何得知

爾時善思離車童子聞是語已。即還以偈報阿難言

我已誓捨身	著此無為鎧
無望故求道	多聞如是知
為五欲所迷	墮於可畏獄
今見無上尊	我云何不喜
世尊大慈愍	化度諸眾生
我身不墜傷	今在佛前住
虛空及我體	此二悉是無
身及空既無	云何當畏壞
佛身及空體	真實不可分
能有此忍心	彼中無怖畏
虛空及大地	真如中悉無
我今真實知	是故無恐怖
虛空遍大地	畢竟不可得
無真無生故	真實無驚畏
虛空無有高	下處亦無有
如是法知者	彼無虛可驚

爾時善思離車童子說是偈已。佛即問言。善思童子。汝不畏耶。是時善思即答佛言。善哉世尊。我實無畏。佛復更問善思童子。汝不恐耶。善思答言。善哉世尊。我實無恐。佛復問言。善思童子。汝不怖耶。善思答言。善哉世尊。我實不怖

爾時世尊讚善思言。善哉善哉。善思離車。真實善哉。汝今乃能如是不畏不恐不怖。佛因此事即為善思。而說偈言

有有故怖生	彼有不可得
能定此忍者	彼即近菩提
取相言眾生	而眾生無有
能如是了達	彼即住真乘
菩提無得人	不得得不得
離此得不得	恐怖心則無
若能如是知	有無皆不住
善思汝當識	此路趣菩提

爾時世尊說此偈已。復告善思作如是言。善思童子。是故菩薩摩訶薩等。若欲速疾安樂得成阿耨多羅三藐三菩提者。當應須念常相樂相我相淨相。及眾生相壽命養育福伽羅相。此相即是阿耨多羅三藐三菩提真正直路。善思童子。我於往昔發心行於菩薩行時。常念此路。以是義故我乘此路得至菩提。然其此路無有一法而可得者。此即是我無上菩提

爾時世尊欲重宣此義。而說偈言

我雖說常相	其常非是有
既知無有常	即無有諍競
有著樂相者	樂亦無真實
此是顛倒見	分別福伽羅
若知諸法真	各各無集處
彼等不作相	命及福伽羅
路非是菩提	非路亦復爾
我說此本性	諸法無處所
本性及眾物	智者不分別
善思汝當知	此路向菩提
若著如是路	彼佛非行道
若著有相者	彼不知諸法
亦不能乘乘	諸佛所憐愍
無有人能行	此寂甚深處
一切處無物	彼物不可物
既無有物故	彼樂無處生
諸樂及諸苦	此路如虛空
能得如是覺	彼心得解脫
我雖說我相	此法亦無有

既無有我所
既無有智知
壽命分別有
無有言知者
我相及壽命
本性及諸物
彼等不能近
不聞深經典
此經典不說
我不得諸法
我昔坐道場
此智我如是
菩提及道場
凡夫輩分別
此是假名字
甚深及諸佛
不聞此經典
彼等不知味
菩薩行苦行
言佛及菩提
如是思惟已
稱有諸境界
既有染著處
若有諸眾生
彼等大唱說
是故汝善思
精勤當用心
彼法實無礙
如是說之時
眾生顛倒見
非以禪定求
三昧非三昧
此非智境界
雖令覺彼際
此法從緣有

亦復無有智
此即智境界
其相畢竟空
小智即迷惑
本性非是有
此愚癡境界
不思議佛乘
復不讀誦持
無有諸法相
說處亦復無
無一智可證
菩提不可得
此二無證者
諸佛說諸法
諸佛甚深處
此是魔境界
佛世尊所說
諸法利益處
其行無知故
此二不可見
妄言諸佛說
倚之而生著
彼等不見我
成就甚深智
諸佛不思議
欲知甚深法
即知法真實
故名為甚深
名為不可得
此非彼境界
可知真實義
空中不可得
無智亦復然
亦非智境界
甚深即能入

若有樂寂靜 則無有彼此
若心能信樂 正說此經處
彼非一佛邊 昔種諸善根
於多諸佛所 乃能受持此

爾時世尊說此偈已。復告善思離車童子作如是言。善思童子。以是義故。諸大菩薩摩訶薩等。一切應當著如是鎧。於世間中所有恐怖驚畏之處。應於彼中不生驚畏恐怖之意。發於此心如是著鎧。是時善思即白佛言。大聖世尊。我信如是而世間中所不信處

爾時世尊復告善思童子。有諸菩薩摩訶薩等行於甚深。有如是相有如是瑞有如是形。彼等一切諸善丈夫。觀於世間無有諸法可優劣者。既見一切諸法平等無有優劣。如是知己而心不畏不怖不驚

斷一切諸法如是知己而不驚。不斷一切諸法如是知己而不怖
有一切諸法如是知己而不驚。無一切諸法如是知己而不畏
聚一切諸法如是知己而不驚。散一切諸法如是知己而不畏
和合一切諸法如是知己而不驚。不和合一切諸法如是知己而不畏
嫌一切諸法如是知己而不驚。不嫌一切諸法如是知己而不畏
思念一切諸法如是知己而不驚。不思念一切諸法如是知己而不畏
造作一切諸法如是知己而不驚。不造作一切諸法如是知己而不畏
境界一切諸法如是知己而不驚。非境界一切諸法如是知己而不畏
歡喜一切諸法如是知己而不驚。非歡喜一切諸法如是知己而不畏
世諦一切諸法如是知己而不驚。非世諦一切諸法如是知己而不畏
寂靜一切諸法如是知己而不驚。非寂靜一切諸法如是知己而不畏
解一切諸法如是知己而不驚。不解一切諸法如是知己而不畏
持戒一切諸法如是知己而不驚。破戒一切諸法如是知己而不畏
明一切諸法如是知己而不驚。無明一切諸法如是知己而不畏
有名一切諸法如是知己而不驚。無名一切諸法如是知己而不畏
一切法出如是知己而不驚。一切法不出如是知己而不畏
一切法怖如是知己而不驚。一切法不怖如是知己而不畏
一切法生如是知己而不驚。一切法不生如是知己而不畏
一切法死如是知己而不驚。一切法不死如是知己而不畏
一切法菩提如是知己而不驚。一切法非菩提如是知己而不畏
一切法涅槃如是知己而不驚。一切法非涅槃如是知己而不畏。能作如是說法之時

。是名菩薩不畏不驚不恐不怖

爾時世尊說是語已。欲為善思重宣此義。而說偈言

一切法無有	真如不迷惑
諸法無有故	彼相即寂滅
諸法無優劣	此彼悉皆無
一切法無故	真實亦復無
諸法有優劣	此彼亦各無
諸法既悉空	則無有諍競
一切法既無	本性何有性
其性無有故	云何有壞滅
諸法有斷耶	智者無此念
但假有斷名	求斷處不得
欲斷一切法	微細求覓無
毫末及眾多	諸法皆無有
諸法無有者	此亦是言說
彼中如是無	但有中示現
一切法無形	但有相中現
有有及無有	一切皆假名
一切法有合	示現不合者
真如無合故	畢竟無有物
諸法無和合	無作無滅者
如是亦不得	諸法各各無
諸法不可得	彼等前際無
本際既無故	故名為實際
一切法歡喜	歡喜不可得
既無有諸法	彼亦不可說
諸法無歡喜	彼等二皆無
真如中無物	此是甚深相
一切法無嫌	真如中無我
真如無有故	彼無有嫌處
涅槃無讚歎	彼法不可得
諸法無有故	故名為涅槃
諸法無明者	真如中示現
此是假名說	是故名為思
諸法無思者	此法無定處
是故無眾生	此是諸法體

一切法如幻
諸法不得故
諸法既無為
無有諸法處
雖言有境界
而凡夫所說
諸境界虛妄
說無有境界
言一切法體
彼等既無有
無得言有得
得無得之處
彼處無持戒
無行及無戒
一切法悉無
無有諸法故
諸法名字者
既無有法名
說有受名者
是處無有受
無有為有相
諸法中離有
如見幻華已
有有無有知
法生處不知
愚癡人故言
諸法若有生
生處及死處
一切法皆空
善思汝當知
菩提不可作
若當得菩提
若分別菩提
行行及菩提
一切有真實
彼幻不可得
說有為諸行
此彼真如體
故言無有邊
境界實無有
故名為境界
故說無境界
是境界真相
彼等無有數
寂定汝等知
示現有得處
示現故有得
及破戒亦無
如是諸法相
故名為無明
汝當知是明
彼名實無有
當知是涅槃
以受故示現
故言受示現
示現名為有
故言常無有
愚癡言有相
是處智無惑
此二不可得
說此為生處
應說當有死
此二不可得
諸法不可得
我說如是法
是處作者無
應即見三界
彼不行菩提
彼等無分別
真實無有處

真實無得故
畢竟無出者
無有諸物故
若能知此義
彼等無可生
說此甚深法
汝應知彼人

此是涅槃相
彼無處可得
不滅復不滅
諸法無真實
即不相諍競
若無恐怖時
真實是菩薩

爾時世尊說此語已。善思童子復更以偈。重白佛言

世尊利益我
說此法相時
今者具足滿
我諸見網薄
我已斷生死
如來說相時
為我說得處
無畏益世間

出現於世間
我無有疑惑
佛出不思議
今得脫魔網
已住道場內
斷除我疑結
摧滅諸見等
善去我心垢

善思童子經卷上

善思童子經卷下

隋天竺三藏闍那崛多譯

爾時世尊。復告善思離車童子作如是言。善思童子。此菩薩行無虛妄行。善思童子。此菩薩行是哀愍行。善思童子。此菩薩行是無患行。能斷一切諸過患故。慈憐一切諸眾生故。善思童子。此菩薩行甚深微妙無有相行。善思童子。此菩薩行真實能離一切欲相。善思童子。此無欲行無愛憎故。善思童子。此菩薩行一切眾生平等心行。其心畢竟無所得故。善思童子。此菩薩行大慈悲行。於一切法無有得故善思童子。此菩薩行大布施行。無有施故。善思童子。此菩薩行不虛誑行。不受一切後身報故。善思童子。此菩薩行無惱忍行。現無諍故。善思童子。此菩薩行發誓願行。捨懶惰故。善思童子。此菩薩行是三昧行。以寂靜故。善思童子。此菩薩行是智慧行。於一切法無有得故。善思童子。此菩薩行是無畏行。心無恐故。善思童子。此菩薩行是無礙行。成就如來諸智力故。善思童子。此菩薩行是增益行。入智慧門無有著故。善思童子。此菩薩行觀十方行。無染著故

爾時世尊。欲為善思重宣此義。而說偈言

無疑惑行者	為諸菩薩說
疑惑及諸行	此二不可得
為諸菩薩說	有行無行處
若知此行處	彼等無諍競
攝受一切法	為諸菩薩說
無所有得處	此行最為上
我行此行處	彼則顛倒行
既往顛倒行	彼無有畏處
此雖名諍行	彼諍不可得
若能如是知	彼行最上乘
此乘無有驚	佛乘最為上
驚及無驚怖	一切法假名
雖說諸行處	一切不可得
一切既不得	彼行最為上
此行甚深行	愍於一切法
愍及甚深行	皆從分別生
甚深及諸行	是處二俱無
若知此際者	彼於法無沒
諸法無可染	非法亦復然
此諸法本性	當說無染處
無牢及無固	此但是有現

無有名字處
我雖說有愛
以無有物故
此諸眾生行
若有知此者
此處無眾生
眾生法一等
心及有眾生
此名為最慈
世間大施主
常樂行布施
法尚不可得
大智菩薩輩
佛既不可得
此戒不缺犯
彼等不思議
不分別戒行
忍向眾生輩
此是最勝忍
心不可得故
此是最上忍
菩薩無懈怠
此名最精進
身心善質直
是名最精進
菩薩能懶惰
能不捨不取
心界不可得
故名最定心
攀緣及心行
不思彼三昧
我說此三昧
能行此行者
不以智能知
真如及智慧

此句最為上
彼處無恐怖
彼處不生競
此處無有真
彼為善說行
故我說眾生
此路最為上
畢竟不可得
我前說大慈
亦名大眾生
故名大施主
況復當有邊
故名為施主
法亦不思議
諸法無倚處
佛戒不思議
為諸菩薩說
眾生畢竟無
我法行中說
諍競無處生
諸法不可得
不被他毀辱
名為不捨取
能辦於此行
為諸菩薩說
不發諸行等
彼住最精進
若外若在內
其心無有處
真如中無有
示現如是定
自在修伽陀
我說彼得定
有諸真如法
此二邊無有

此法不可得
法不以識知
能知如是者
菩薩真如行
彼勝一切眾
彼無眾生相
眾生如幻化
如是能說者
若我若他身
能有此智者
諸內及與外
心無怯弱處
諸法無有礙
既如虛空行
若能知此智
巧解一切法
既知無眾生
界智巧解知
若入是法門
有能從此道
境界及眾生
欲識諸法門
若內若有外
無礙諸法中
諸法不思議
彼無所有處
若能如是行
智既無有礙
諸法不思議
諸法既無體
佛及諸佛法
菩提無有故
乘此大乘者
此世最為勝
凡世間所有

此是識境界
真體此處寂
彼等名真念
世所不能行
為眾生說法
況復有徒眾
幻化亦無有
彼無有恐怖
此二俱無有
彼無有驚懼
有相畢竟無
即勝一切世
猶如虛空行
法真如亦然
菩薩無所畏
彼知眾生行
一切法亦然
彼界不可得
此路最為勝
即知眾生行
此二無有物
須知此勝智
智慧無集處
故名為實際
故名為佛法
其處亦復無
世間無障礙
故名為佛智
彼輩無真正
是覺諸佛法
此二俱無有
是名為佛道
到法安樂處
人世不可得
一切處眾生

彼菩薩為勝	行此勝智者
能求此諸法	佛法不思議
能得此諸法	彼即近菩提
菩提及諸法	此二畢竟無
能作如是行	即近諸佛法
能行此行者	不染諸世間
既無有染心	彼去菩提近

爾時世尊說此偈已。復更重告善思離車童子作是言。復次善思。我今宣說若有菩薩摩訶薩等善著鎧者。能於如是甚深經典能善說者。最妙微密善說之時。聞已其人能不驚怖不悔不沒。如是菩薩摩訶薩等即得住於菩提道場。即得入於諸佛境界。即證無礙。即住無為解脫法門。又能巧住無得之行。即能觀察一切十方。即能證得大慈大悲。即得諸佛十八不共法。即得無上最大灌頂。說此甚深微妙法時。能有信行能有思惟如是法者。諸佛已觀彼等菩薩。一切諸佛已護持彼。若菩薩能信此行者。或有不信於此行者。亦為一切諸佛所知。若有能入此法門者。諸佛已知。若能信行此法門者。我當為於彼等作師。彼等則為隨我出家

爾時世尊。欲為善思重宣此義。而說偈言

彼等證道場	道場者即空
若不取菩提	彼等即住智
諸法無有礙	畢竟不可得
法既不可得	解脫亦復然
諸佛智行者	一切諸法處
及於諸法行	世尊如是說
有礙無礙處	愚癡作是心
佛及大菩薩	不如是分別
雖觀世間法	世間畢竟空
智能觀世間	彼智亦無有
眾生及諸佛	一種無分別
既無分別處	彼慈最為勝
法界廣大性	眾生界亦然
大智諸菩薩	不如是思惟
雖復欲起慈	彼慈實無體
慈體及無性	非眾生境界
若五指量空	先無今亦無
諸世間亦然	此慈最為勝
諸法無上者	名為諸佛法

彼等無得處
世尊大慈悲
如是無色法
虛空無有邊
諸佛如是法
是即無上智
智既無得處
此岸及彼岸
彼等無此行
若知此等法
於我法行中
若作取捨心
此事言有者
有言此法成
善思此比丘
言證苦滅者
如是說法師
諸法無起處
無起處說滅
如是寂法中
諸法既無有
若有諍競心
善思汝知此
說道及與法
既示現有處
我說諸菩薩
能作如是行
能行此行者
彼已供養我
能持此經典
彼於未來世
我所說諸法
此即是菩提

此即是真體
無有形與色
是行名世間
境界不可執
智者行此順
而智不可得
彼處實無有
若思惟若見
甚深是名相
一切處平等
不假求知識
分別二見處
彼非善知識
或言此法滅
非是我弟子
畢竟不可得
彼非說我法
何言諸法集
彼等遠我法
無有分別處
滅處亦復無
豈名說寂滅
彼不名真實
此是示現有
彼假現有路
未來世大智
彼依此境界
諸佛說甚深
利益諸含識
諸大智菩薩
住持諸法故
常住無分別
離此無別道

爾時世尊說是法已。是時善思離車童子。於諸法中即便證得無生順忍。既得證彼無生忍已。遠離一切世間憂喜得大歡樂。即更飛騰上虛空中。離地高於七多羅樹

爾時世尊。當於彼時即便微笑。而諸世尊。有如是法微笑之時。從其面門出種種光其光雜色。所謂青黃赤白紅縹綠紺頗梨。彼之光明如是遍照無量無邊諸佛世界。乃至有頂大梵天宮。照已還迴至於佛所圍繞三匝。遶已從於佛頂而入。當入之時此之大地。具足六種十八相動。動遍動等遍動。踊遍踊等遍踊。沒遍沒等遍沒。震遍震等遍震。吼遍吼等遍吼。覺遍覺等遍覺

爾時上界虛空之中。天雨種種細栴檀末。沈水末香及天華雨。天諸種種微妙音聲自然而作。此之三千大千世界清淨莊嚴。猶如北方鬱單越國。莊嚴華麗一種無殊。此之三千大千世界亦爾無異

爾時長老阿難比丘。從座而起整理衣服。偏袒右肩右膝著地。合掌向佛而白佛言。希有世尊。未審如來有何因緣微笑放光。諸佛世尊非無因緣而放光明。作是語已即便以偈。而白佛言

諸佛世間最勝尊	微笑放光必有以
利益之處願尊說	有此瑞相何因緣
虛空天雨華	供養世尊故
歡喜皆歌嘯	稱讚說此經
三千世界中	種種莊嚴淨
猶如鬱單越	光普照十方
如昔諸世尊	其中授記者
佛出光照訖	迴入佛頂中
世尊所放光	其光種種色
從佛面門出	為我說此因

爾時世尊。即以偈告長老阿難。作如是言

此童子善思	宿植善根厚
當於未來世	成佛兩足尊

爾時世尊。說此偈已告阿難言。阿難。此之善思離車童子。從今已去供養恭敬億那由他阿僧祇劫諸佛如來。承奉不違彼諸佛教。又復供養彼諸世尊。衣服湯藥房舍臥具四事皆足。彼諸如來滅度之後供養舍利。以種種寶而用作塔其一一塔各各皆高百千由旬。於彼一切諸寶塔中安置舍利。以諸名香供養彼塔。復將一切華鬘校飾。一切諸寶一切諸幡。種種妙華及栴檀末沈水末等。而以散上。復將最妙種種音聲以供養之。供養彼諸多陀阿伽度阿羅訶三藐三佛陀已。捨最後身而得作佛。名為淨月多陀阿伽度阿羅訶三藐三佛陀。出現於世善逝世間解無上士調御丈夫天人師佛世尊

爾時世尊。欲為阿難及諸大眾重宣此義。而說偈言

若滿十方界 諸寶妙珍奇
布施佛世尊 及諸菩薩眾
得聞此法相 如大聖所宣
校量財施功 此福多於彼

爾時長老舍利弗。聞佛世尊說此校量功德語已。即更以偈而白佛言

世尊說此經 甚深最微妙
而不說名字 我等云何持
此經典所明 諸法皆平等
無有得不得 希有佛善說
有漏及有為 無漏無為法
此經不分別 世尊善巧說
世間出世間 世諦第一義
二界無有異 此經如是說
佛所說諸行 方便為眾生
真理皆悉無 世尊金口說
諸佛及諸法 彼等一切無
能所乘並空 希有佛善說
十方諸世尊 所說諸法相
彼等無真體 此經如是行
善哉大聖尊 善哉最勝智
此經名云何 為我等解說
智慧此語已 今日決諸疑
八功德相圓 音聲告於彼
欲知此經者 名為灌頂王
雖言灌頂王 灌頂亦無有
能持此經者 諸佛說彼人
於天人世間 當為如寶塔
我說是經處 聽眾有八千
多種諸善根 發無上道意
彼等於來世 決作無上尊
得聞此妙經 難思議福德
止住安隱處 甚深善根中
彼乃如是能 受持此經典
係念專讀誦 此之灌頂王

彼等人輩於
此不說初忍
諸法相既空
若人受持此
彼作如是等
若有智女人
速捨女雜穢
一智一切知
此是持諸法
此經所說法
我說此入道
即知種種名
雖復說諸法
所有無言體
知是諸法門
言無諸法者
此是法體相
若人欲無邊
當持此經典
欲求法界邊
彼界不可得
一切法甚深
既無法得處
若成就辯才
乃能知此義
如阿耨達龍
彼無有心想
若欲廣多宣
依此經中學
彼法無來處
諸法無有生
如日光明照
此經如是明
來世善男子
當學灌頂王
諸法無疑惑
第二忍亦無
云何有說處
灌頂王經典
諸法乘辯才
受持此經典
罪業不淨身
一切智一知
此經中具說
入處如虛空
作諸法光明
處處有多種
彼法不可得
其相畢竟無
是名受持法
彼處有無無
名為陀羅尼
一切光明照
善說灌頂王
此中已說訖
故名陀羅尼
法者無得處
彼處無常無
智深遠無礙
是經無所著
於空中降雨
名不可思議
種種辯才說
無倚一切法
善說如此經
如此經所說
彼光無處來
法光常充滿
欲無盡辯才
善說此法本

速得無礙辯
若學灌頂王
若不修此法
彼人不受持
彼等四部眾
不解此義人
若有四部眾
無上諸法中
如忉利宮殿
此經典亦然
如立須彌頂
如是住此經
如人暗夜中
彼人所行處
此經光所照
能持此經者
譬如日光焰
此經典亦然
又如虛空月
如是此經典
此印諸法印
故遣住此印
如欲印虛空
虛空及與印
如是佛及法
諸佛不可說
如王捨命時
勅諸大臣等
如是聖法身
阿難汝來世
我以說此經
能持是經者
能信受此經
彼人若致疑
人欲自在辯

甚深不思議
世多作利益
無上灌頂王
如是無譬喻
遠我法行中
無義可能義
能行此行時
即為世間眼
顯現高巍巍
世間最為最
覩見世間人
觀見一切法
乘高大火炬
終無諸黑闇
明見一切法
彼無諸闇黑
一切處悉明
能出多種法
放光明流轉
遍照十方界
一切印中印
為諸菩薩輩
本無亦不住
此二是分別
此經中所說
諸法亦復然
慇懃善囑授
財付我諸子
我昔修習得
付囑諸菩薩
為諸菩薩輩
此人福甚多
依灌頂王說
我當不作佛
於諸法無礙

應當學此經	我善說灌頂
世間說諸法	彼是菩提道
知己莫應怠	此經當讀誦
彼等正信人	於世間無惑
既讀誦此經	復能為他說
此是諸佛法	為諸菩薩說
得聞此經已	甚深難思議
當說此經時	十方一切佛
微笑放光明	各言善說此
豎立大勝幢	法幢不思議
此經四句偈	為大眾演說
巧行多方便	不思議法中
能持此經者	兼復為他說
彼人共佛語	證法無上尊
能持此經者	不思議灌頂

爾時世尊說此偈報舍利弗已。復更重告長老阿難作如是言。阿難。若有比丘或比丘尼諸優婆塞及優婆夷。於當來世有能信心聽此經典受持讀誦。彼人當得最大福德。其福德聚不可稱量無有邊際。譬如空界。無有人能量知邊際。如是如是。長老阿難。此法本中有能受持一四句偈。或自讀誦或為他說。彼人所得功德善根。亦不可量亦不可說無有邊際

爾時世尊欲為阿難及諸大眾重宣此義。而說偈言

若能讀誦此	無邊方便身
利益多眾生	灌頂王憐愍
假使我今說	虛空可度量
欲比校斯經	不可得窮盡
十方一切佛	世中無上尊
若受持此經	悉皆供養彼
十方一切佛	斷生死法王
能持此經人	名已供養彼
十方諸世界	除斷十惡根
聞此經典人	能供彼諸聖
我未來諸佛	及過去如來
現在十方中	兩足尊無上
能作師子吼	彼悉供養之
能受持此經	諸佛所宣說

持資財供養	此非正智人
若能持此經	供養中為最
一切十方界	滿七寶行檀
以供諸世尊	劣持此經福
若學此經典	一如灌頂王
此敬諸如來	真實如中顯
我所說諸法	諸佛不可得
彼聞不驚怖	即是供世尊
此供養甚深	世間無解者
不取及不捨	此供養最勝
諸佛及諸法	一切不取捨
此供養最勝	諸佛世尊歎
往昔定光佛	我供養此法
此供最為勝	為諸菩薩說
於時彼佛邊	我持此供養
彼佛授我記	汝當得作佛
若當欲作佛	復為眾生最
應成就此路	是名供養佛
我如是供養	今得成佛道
洞達一切法	堪受天人供
所有諸佛法	世間無上尊
乘此最勝供	諸供養中最
證於佛境界	智慧不思議
能作師子吼	如我今無畏
作師子吼已	得諸法自在
解脫眾生輩	入無漏涅槃

爾時世尊說此經已。善思童子及毘耶離。一切大眾天龍夜叉乾闥婆阿修羅人非人等。聞佛所說皆悉信受。歡喜奉行

善思童子經卷下